



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : Tir Yimyim


tiryimyim@aolima

tir yimyim

TAPAK 8

Chhattisgarh nung küm 5 tsüngda
Maoists samatsütsü: Amit Shah

Asian Championships: Parneet
Kaur-i gold medal angu



VOL. XXI NO. 33 (ADOK 33) DIMAPUR

ROGONÜ (FRIDAY)

YIMPOKSÜI (NOVEMBER) 10, 2023

₹ 5.00

NLA nung tetsür reservation aliba aser ali nung tax maliba Municipal Bill tasen agizükogo

Kohima, Yimpoksüi/Nov. 09 (TYO): Tetsür aser tebur nem maongka kasa agütsütsü mechi tanü Nagaland nung otsü tasen yanglua tetsür nem menden shilem 33 wazükja Nagaland Municipal Bill 2023 agizükogo, kong ali aser ki o jen indang tax indoker.

Iba Bill tasenba ya Nagaland Legislative Assembly (NLA) indang anogo ka 'emergent session' alidang Chief Minister Neiphiu Rio-i benok aser political party ajaki molunga agizük.

September 12 nü CM Rio-i iba bill ya benok, saka House-i agienba sülen Deputy Chief Minister TR Zeliang-i anir züngsem tenet agi akumba Assembly Select Committee ajanga recommendations agütsüba nung ajemdaker Rio-i tanaben Bill ya benoka liasü.

Assembly nung iba Bill indang jembishinü tembanga mapang, Municipal Bill tasenba nungya ali aser ki o jen nung tax aliba

indokogo, ta Rio-i ashi.

Supreme Court ajanga totuyuba agütsüba ama iba bill nung tetsür asoshi ULBs nung menden 1/3rd wazükja yuja lir aser state nung apex tribal bodies temia agizükogo, ta pai ashi.

Ajisüaka taoba Municipal Act nung ULBs nung chairperson indang office asoshi 1/3 reservation aliba iba Municipal Bill nung maden ta pai ashi.

"Iba ozüing ya tatem masü tang ang tenzüker. Urban local bodies ketdangsüba nung tetsürtemi shilem agitsü mapang aruogo," ta CM Rio-i ashi.

Nagaland nung tesüiba küm 20 tsüngta ULB election aiben agitsü merang, saka iba dak sendakba nung sorkari tia maka tatalokba kar ajurua tang tasenba Nagaland Municipal Bill, 2023 ya yanglutsüsa akum, ta pai ashi.

Deputy Chief Minister TR Zeliang tekolakba sür House nungi züngsem tenet aliba Select Committee ajanga iba Bill ya

asadang aser taoba mapang yanglua aliba ozüing agizükba aser nüburtemi aginüba ama aser iba Act tajungtiba akumtsü mechi Bill nung clauses kar inoksemtüsü benok, ta Nagaland Chief Minister-i ashi.

Municipal mesüra Town Council mashi nung züngsem akumtsü asoshi State nung lisopor dang shimtsü aser Municipal Act ya küm ter sülen reprangshitsü parnoki ashi, aser yamaji asen CSOs aikati shia liasü, ta pai ashi.

"Urbanization tsütsü asen state ya menur tenzüker asütsü akok. Ajisüaka Nagaland nung urbanization rate ya tang kanga kera ainer. Tang state nung urban local bodies 39 lir. Asenoki jila nung nütsüing renlokba nem local self-governments ajanga nungdakba 'infrastructure' aser 'amenities' agütsütsüla," ta pai ashi.

ULBs dak sendakba nung tangatettep kati arutsü

merandang tapayutsü küm aika süyidaktsüba sasaseta jembidang, Nagaland Municipal Bill, 2023 tasenba agizükba ajanga ULBs temi nungdakba mera agia jila aser yimitem tajungba nung ketdang sütettsü, terenlok tali alitsü, tajungba, temürekba aser tebour tajungba akumtsü inlar, ta Rio-i ashi.

Rio-i September 12 nü House nung benokba Bill ya asadangtsü asoshi Assembly indang Select Committee nem nungloktsüba ama Deputy Chief Minister TR Zeliang-i osang agüja liasü.

House-i Select Committee osang agizük aser ajaki molunga September 12 Bill agien asr iba sülen Chief Minister Rio-i benokba Bill tasenba ya agizükba liasü.

Iba Bill agizüktsü bhukuma Assembly nung political party ajanga lenirtemi shilem agia jembia liasü.

Iba senden tembangba sülen osangbener den jembidang, iba

Bill ya ajaki molunga House nung agizükogo, ta Chief Minister Rio-i ashi.

Iba Bill agizükba sülen ULB elections ya kodang agitsü ta asüngdang dang, iba maparen tenzüker aser State Election Commission ajanga tekeraba nung anogo tem sangdongtsü, ta Rio-i langzü.

ULBs nung tetsür menden wazüktsüba nung Ao Senden-i memolungba indang asüngdang dang, "Ajaki agizükogo saka yangji temolung machiba mesüra mangatettep kar lira onoki parnok nem angatetdaktsütsü aser sapang kati anir arutsü," ta Nagaland CM-i ashi.

Party balala nungi NLA züngsem temi iba Bill bhukuma pei bilemba lemsatepba sülen Assembly Speaker Sharingain Longkumer-i vote agiteptsü asoshi Bill ya benok aser ajaki molunga voice vote ajanga agizük aser iba sülen senden tembangba liasü.

ENPO-i akhangba ya ajak tebilemstü lir: CM Rio

Kohima, Yimpoksüi/Nov. 09 (TYO): Eastern Nagaland Peoples' Organisation (ENPO) ajanga akhangba ya ajak tebilemstü lir, ta Nagaland Chief Minister Neiphiu Rio-i Brehostibarnü ashi.

"Iba ya ajak tebilemstü lir aser ibai nisung ka asaya kisung masü. November 7 nü ENPO lenirtem aser State sorkar tsüngta senden junga menogo aser parnoki akhangba points pongu nung sorkari asemer ta parnok dang shiogo," ta pai ashi.

Ajisüaka iba amala terenlok maparen nung politics malitsüla, ta Rio-i ashi.

Centre aser ENPO tsüngta jembishinüba nung state sorkar adenba ajanga ken o tatem kati arutsü menudaktsür asü ta asüngdang dang, Union Home Minister Amit Shah aser danga Central ketdangsür temi State Cabinet dang iba atema telok asem (GoI, ENPO & state sorkar) tsüngta jembishinütsüla ta ashi aser iba yongji state sorkar dena jembishinü asür, ta pai langzü.

Hornbill Festival nung shilem magitsü taoba küm pangzüing renemba nung ENPO akangshia nokdakba indang jembidang, "Iba indang onoki jembitsü," ta ashi.

R-Day parade nung adenba NCC Cadets atema tatidang balaka agitsü

Dimapur, Yimpoksüi/Nov. 09 (TYO): New Delhi nung agitsü aliba Pre Republic Day Camp aser Republic Day Camp 2024 asoshi shimteta aliba NCC Cadets tem November-December 2023 nung agitsü aliba semester tatidang nungi atoker, ta Nagaland University ajanga sangdong ka nung ashi.

November 30, 2023 nungi Pre Republic Day Camp agitsü aliba nung adentsü shimteta aliba NCC Cadets aser shimteta January 31, 2024 tashi Republic Day Camp nung adentsüpurtem aruya aliba Under-Graduate odd semester examination 2023 nungi atoker, ta sangdong ajanga ashi.

Item kaketshir/NCC Cadets tem asoshi tesülen University ajanga tatidang balaka agitsü. Kasa mapang shia aliba Camp(s) nung adentsü shimteta aliba kaketshir/NCC Cadets tem taruba semester nung provisional admission agitsü melatsü, ta NU sangdong ajanga ashi.

Delhi Cantt nung Republic Day Camp aser 'Kartavya Path'

nung Republic Day Parade ya NCC training sentong tongtipangtiba rongnung ka lir, kong NCC Cadets ajungai shilem aginer. Ajisüaka NU semester tatidang küm shia November-December mapang aliba ajanga Nagaland nungi tejangrar temi item camp nung shilem magiteter.

Iba tatidang atokba ya sempet aliba Naga nunger kaketshirtem pei sempet national aser international jenjang nung sayutsü asoshi maongka tajung ka lir, kechiaser Republic Day Camps nung shimteta ajanga parnoki 'Youth Exchange Programme' nung shilem agiteter aser teshimtet NCC Cadets temi linük balala nung NCC mesüra kasa jenjang nung sorkar mesüra lanur lokti tentet exchange programme nung shilem agiteter.

NCC ya USA, UK, Argentina, Brazil, Russia, Nepal, Vietnam, Maldives, Mauritius, Seychelles aser New Zealand densema linük balala nung Youth Exchange Programme balala agir.

Manipur nung teti asoshi yimjung khanga NSF & NESO-i sentong agi



Manipur nung teti asoshi yimjung khanga North East Students' Organisation (NESO) kübok Naga Students' Federation (NSF) ajanga November 9, 2023 nü Kohima nung Raj Bhavan kima sentong ka ayongzüka agidang tangokba noksa ka yangi angur.

raksaogo ta ashi.

Kohima, Yimpoksüi/Nov. 09 (TYO): Manipur nung teti asoshi yimjung khanga North East Students' Organisation (NESO) kübok Naga Students' Federation (NSF) ajanga tanü Kohima nung Raj Bhavan kima sentong ka ayongzüka liasü.

Manipur nung yimjung khanga jembidang NSF tatong tir Mteisuding-i ashiba agi, azüdokshi agi nisung zünger mezüingma takum agir aliba aser tesüiba ita trok tashi asadangtsü makok timtema aruba kidanger state, Manipur bilemteta sarasademtsü asoshi iba sentong ya ayongzü.

Raratepa aliba telok ajunga dang tesunep-yimjung alitsü ayongzüka mapang iba azüdokshi anendakja tanaben jungshiteptsü asoshi Government of India nungdakba mera magiba asoshi temolung masüba pai lemsatepa liasü.

"Asenoki tanü tesunep asoshi yimyim ayimba ya northeast region ajunga nung socio-economic, yimtenrem aser sobaliba balala ajungai yimjung bushitsü asoshi mepishiba ka lir," ta pai ashi.

Tang mepetmesü adoka aliba ajanga yangji shilem agirtem dang masü saka region ajunga nung asadangtsü mokoki timtem ajurua aliba atema temolung shiranga jembidang, nisung takum samaogo, ki o jen raksatsüogo aser region nung lokti tesendaktep

Teti Northeast Region ya senzükba yutsür aser bendanga amshir ama angateter, aser iba timtem nung kera telangzüba tajung magütsüba ajanga azüdokshi ang atsülangtsür, ta pai ashi.

Iba mepetmesü yagu senso ajak asodang nungi aliba yimjung aser tesunep temeden samatsütsü amokmerener.

NSF tenüing nung pai mangatettep adoka aliba kintem dang lungjemer region nung teti asoshi yimjung lenmang bushitsü ayongzüka liasü.

NSF-isa Government of India dang iba ken o nung tekeratiba nung mera tajung agitsü, nungdakba teyari agütsütsü aser yimjung ken o jembitsü asoshi nungdakba nung yaritsü ajungshia liasü.

"Asenok temolungtetba aser lungjema lira, asenoki yimjung ngutettsü, aji asen teimla aser asen mangdang lir," ta Mteisuding-i ashi.

Iba sentong nung NESO Secretary General Mutsikhoyo Yhobu-i jembidang, Government of India dang tai maketba takum lalua politics masayatsü ashi. Manipur nung azüdokshi anentsü asoshi Centre-i temolung agüja inyaktüsüla aser nungdakba mera agitsüla, ta pai ashi.

Mangatettep adoka aliba telok ajak tsüngta yimjung khanga iba sentong ya Northeast States

ajunga nung agir, ta pai metetdaktsü.

Paisa Ato Kilonser Narendra Modi ola madoki melie iba ken o jembitsüla, ta ashi.

NESO Coordinator Ejanthung Ngullie-i kidanger state nung yimjung alitsü asoshi nisung ajaki shilem agitsü ayongzüker aser yangji zünger mezüingmai nisung takum samar aliba asoshi asükhu lemsatepa liasü.

Taoba NSF tongti zülur Imtiyapang Imsong-i Northeast nung aliba senso ajak dang lungjemer nokdaktsü aser Manipur aser Northeast region ajunga nung yimjung asoshi ola adoktsü ayongzüka liasü.

Manipur nung yimjung mali tashi Northeast nüburttem ajem-ajema malitsü, ta pai ashi.

Iba mapetmesü ajanga kaketshirtem azüingba nung timtem ajurua aliba indang taoba NSF tir Kegwayhun Tep-i lemsatepa liasü.

Naga nunger aser Manipur teti kidanger alitsü, anungji region nung terenlok asoshi yimjung ya tongtipang lir, ta pai ashi.

Iba sentong nung NSF general secretary Chumben Khuvung menden liasü aser secretary education Temjentoshi ajanga sarasademer sentong tenzüker aser sentong tembangba auditor general Kawoka Awomi-i sarasadem.

Kohima dist. E-Roll Observer-i ayonga senden ka amen



November 9 nü Commissioner & Secretary aser Kohima district E-Roll Observer K. Libanthung Lotha, IAS-i ayongzüka DC Conference Hall, Kohima nung senden aliba mapang tangolba noksa angur.

Dimapur, Yimpoksüi/ November 9 (TYO): November 9 nü Commissioner & Secretary aser Kohima district E-Roll Observer K. Libanthung Lotha, IAS-i ayongzüka DC Conference Hall, Kohima nung senden ka menogo.

01.01.2024 ya qualifying date ama tang agia aliba Photo Electoral Roll indang Special Summary Revision dak sendakba nung sensak asemstü atema iba senden ya yongzüka liasü.

Senden nung Observer, K. Libanthung Lotha-i, senden amenba nükjidongji tang lepa reprangshiba sentongtem asadangtsü asoshi lir ta ashiba den 01.01.2024 tashi nung arishi küm 18 ajungtsüpurtem Electoral Roll nung voter tasen ama züngoksemtsü koda tongtibang iba indang lemsatepa liasü.

Paisa, political party tem dang revision inyakyim indang nüburtem nem metdaksütsü

mepeshia liasü. Pai, parnok dang parnok kübok aliba tesemtem nung temsü aliba voter tem Electoral Roll nung züngoksemtsü atema ajungshitsü ayongzüka liasü.

Kasa mapang nung Deputy Commissioner aser District Electoral Officer (DC & DEO), Kohima Kumar Ramnikant, IAS-i, Systematic Voters' Education aser Electoral Participation (SVEEP) inyakyim koda tongtibang iba indang lemsatep. Item inyakyimtem ya Electoral Roll nung tenüng züngoksemtsü,

aibelen aliba metongshitsü aser tang aliba detail tem update asüba dak sendakba nung elector tem nem tangazükba agütsütsü asoshi ayongzüka agir. Iba dak sendakba nung pai political party tem dang teka amteper inyaksü aser shilem tajung agitsü mepeshia metetdaksü. Paisa, parnok dang inyakyim kecha tetsükdaksü makai inyakyonga aotsü atema tenüng

züngoksema mapang elector temi tetsükdaksü ajangshibatem indang osang agütsütsü asoshi mepeshia liasü.

Senden nung Polling Station tem atema political party kari Booth Level Agents (BLAs) meshim aliba indang jangja aküm. Observer-i, political party ajak nungi BLA tem shima district kübok Polling Station ajak nung toktsütsüla ta ashi.

Maneni senden nung, elector tasentem züngoksema dak sendakba nung tebilembatem aser tetsükdaksü ajangshibatem indang political party tem nungi lenirtemi lemsatepa liasü. Item ken o tem bentettsü asoshi jenjang tapet agitsü telemtetba agir senden tembanga liasü.

Iba senden ya Assistant Election Officer (AEO) Kohima, Olivi Thurr lenisüba nung agi aser AEROs den NDPP, NPF, aser INC densema recognized political party temi shilem agia liasü.

SHG temi Pagalapahar nung WTP semdang

Dimapur, Yimpoksüi/ November 9 (TYO): Atal Mission for Urban Transformation (AMRUT) kübok National Urban Livelihood Mission (NULM) aser Public Health Engineering Department (PHED) na longjemer November 9 nü New Chumoukedima, Pagalapahar nung Water Treatment Plant (WTPs) site nung sentong ka agiogo.

Iba sentong ajanga "Jal Diwali" campaign tenzüksüogo, koba "Water for Women - Women for Water" omen nung jemdaker agitsü. Tzü dak sendakba inyakyimtem nung tetsürtem shilem aser khuret indang tetsür Self Help Group (SHG) züngsemtem nem tangazükba agütsütsü nükjidong nung iba sentong ya India sorkari ayongzüka lir. Iba ajanga tzü achaayangba nung tetsürtemi shilem agitsü koda tongtibang iba indang metetdaksür aser parnok nem shilem agidaksütsü atema sabang ka agütsütsü meranger.

Field semdangba mapang SHG tem nungi tetsürtem water treatment plant semdangi anir ao aser parnok nem water

treatment inyakyimtem indang metetdaksü liasü. Parnok dang tzü temerek agütsütsü asoshi inyakyimtem indang metetdaksü liasü. Iba ajanga tzü supply asüba nung parnok shilem koda tongtibang indang indang SHG züngsemtem nem angatetdaksür aser parnoki yakyaka shilem agitsü ajungshir. Parnokisa parnok tajangshibatem lemsatepa liasü.

Maneni, PHED DDO H. Nagaho Sema-i, water treatment process indang orientation ka agütsü. Pai, raw water intake, pre-chlorination, aeration, coagulation, flocculation, filtration, disinfection, clear water tank storage, aser kibongtemi tzü lemshiba densema water treatment process nung inyakyim balala indang metetdaksü. SHG ajak nem angati water testing kit kaka agütsü aser iba kit ya koda amshitsü iba indang tangazükba agüja liasü.

Iba sentong nung SHG 30 nungi züngsemtem, District Urban Development Agency aser PHED ketdangsür aser staff temi shilem agia liasü.

Ben Yanthan-i oil palm products Buy-Back sentong tenzüksü

Dimapur, Yimpoksüi/ November 9 (TYO): Director of Agriculture M. Ben Yanthan-i, state nungi oil palm products indang mezüngbuba Fresh Fruit Bunches (FFBs) Buy-Back sentong November 9 nü tenzüksüogo. Item product tem ya Kolasib, Mizoram nung

GAVL Processing Mill-i bener aotsü.

Iba sentong ya 4th mile Chumoukedima kübok NSAPLMB Agri Expo nung agia liasü. Sentong nung department ketdangsürtem, Godrej nungi lenirtem aser local aluyimertemi shilem agia liasü.

NCVBDC-i dengue tashidak indang metetdaksü

Dimapur, Yimpoksüi/ November 9 (TYO): Dengue tashidak ya viral fever ka lir aser yimya agi tzüngluruba mapang aser iba sülen adoker. Iba tashidak ya Aedes merila, koba dang 'tiger mosquito' ta ajar iba ajanga menatepa aoer. Iba merila yagi nisungtem dak aonung masü saka anüngdang meteper. Incubation period ya anogo 2 nungi 7 tashi asür. Dengue tashidak menar silem 80 dakbo temaitsü mesayur aser nisung 20 dak temaitsü sayur aser karbo Dengue Haemorrhagic fever aser Dengue Shock Syndromes amala agi kongshir koba ajanga azü yimdaksür aser blood pressure tajemba kümdaksür.

TEMAITSÜTEM:

- * Ajungbena fever tali akümba.
- * Teret teloktep aser tetsü ashiba.
- * Tekolak kanga menüba.
- * Retro-orbital pain.
- * Teküp nung ara.
- * Swollen lymph glands.

DENGUE AGI KANGA MEJUNGI ATONGA TEMAITSÜ:

- * Tepok ashiba aser tenderness.

- * Azü saksüba mesüra scü nung azü dena aoba.
- * Tebunü aser teni nungi azü terara ayimba.
- * Tashi mali akümba, animesüngzüktetba mesüra minprongba.

TASHIDAK KODA NOKDANGTSÜ:

- * Vaccination kechaia Dengue serological type 4 prongla menokdangtetsü.
- * Dengue tashidak ya merila nem memedakdaksüba ajanga dang nokdangtetsü. Tangar kümzüka toktsütsü asoshi peisasa kümzüka alitsüla. Mosquito repellent amshiang, long-sleeved süoshi semang aser mejangba mapang merila sü amshiang.
- * Merila poktetba tesem ajak aginang; Tzü tatena ayudak ajak nembanga ayutsüla. Disposable ajak agintsüla/ raksa intoktsüla, ki temeket nung tyre tejen, chipo teraksa, crockery amala mayutsüla.

TINYAKTSÜ ASER MINYAKTSÜBATEM, TINYAKTSÜTEM:

- 1. Temang shilanga arudaksütsü atema peria

- 2. Na yipden nung liaka tzü aika jemang. Tzü ajemtsüji kanga tongtibang.
- 3. Fever mozü chiang: Paracetamol mesüra acetaminophen amala mozü chiang.
- 4. Doctor den tongtepratepang: tepunü, teni, natzü mesüra scü nung azü lira medical teyari agiang.
- 5. Merila nem memedakdaksütsü merangang: Tangar memenadaksütsü atema peisasa kümzüka liang. Mosquito repellent amshiang, long-sleeved süoshi semang aser mejangba mapang merila sü amshiang.
- 6. Na lokti nungi pilaliang aser kinungertem nem na kanga junga meita atadakjang.
- 7. Aedes merila poktetba nungi jenboa alitsü atema ki temeket nung tzü bangdaka aliba ajak aginang.
- 8. Naro pot amendakdak auso amala nung tzü atsüngdena tetoktsü.
- 9. Ki telungi merila

- maitdaksütsü atema kichiba aser kishitem nung wire mesh amshiang.
- 10. Anema alirtema Dengue tashi kanga bulua pokteter aliba tesemtem nung merila nem memetepdaksütsü merangang.

MINYAKTSÜBATEM:

- 1. Peisasa temang anepaluba nungi jenboa liang: Peisasa mozü techi mesüra temsüa maliba nisungtem dang ken o tashishi.
- 2. Mozü achiba nung tekümdangtsü: Ibuprofen, Aspirin, aser Naproxen sodium machitsü merangang, kechiyong item mozütem yagi azü yimdaksütsü akok.
- 3. Mapa belema inyakba nungi pila alitsü merangang.
- 4. Tepunü nungi azü yimra tepu meyutsü melena mouthwash amshiang.
- 5. Tzüngluruwa mapang ki temeket nung tzü atsüngdenba osettem aginang.
- 6. Merila nungi jenboa alitsüba mapang: Anepdang yakta aser nikongtsütsü kima mena makazüktsü

- merangang, kechiyong iba mapang ya Dengue menaloktsüba merilatam kanga senzür.
- 7. Tashidak pokteter aliba tesemtem mesemdangtsü merangang.
- 8. Dengue agi shiranger ka semdangba mapang merila nem memetepdaksütsü atema jenjang agiang.
- 9. Steroids: Prescription medeni steroids tamshi; tashidak kanga majung mesüra iba ya magütsür.
- 10. Fogging: Fogging dak dang metaloker teli, kechiyong iba dak side effects keta lir aser iba yagi merila entsü aser larvae mesamadaksür
- 11. Dengue RDT: Dengue Rapid Diagnostic Tests (RDT) agidang kümdangang, kechiyong iba yagi aibelana tashidak potettsütsü akok. Sentinel site (Naga Hospital Kohima aser Dimapur District Hospital) mozükitem nung tashidak mena aliba jenjang jangjashiang. GOI & ICMR-i Dengu tashidak tendangtsü atema RDT amshitsü majungshir.

ELECTION COMMISSION OF INDIA

**REGIONAL CONFERENCE OF THE
CEOs AND SPNOs
FOR SOUTHERN STATES / UTs
ON 09.11.2023**

Hosted by

CHIEF ELECTORAL OFFICER, TAMIL NADU



Chennai, November 09, 2023: Taruba Lok Sabha election atema Brihostibarnü Chennai nung south tsütsülen aliba state tem nung CEOs aser SPNOs senden nung Senior Deputy Election Commissioners- Dharmendra Sharma aser Nitesh Kumar Vyas na den election ketdangsertem adenba noksa nung angur.

Chhattisgarh nung küm 5 tsüngda Maoists samatsütsü: Amit Shah

New Delhi, Yimpoksüi/ November 09 (Agencies): Brihostibarnü Union Home Minister, Amit Shah-i, Chhattisgarh nung BJP sorkar arura party-i state nung küm pongu tsüngda Maoists telungpurtem samatsütsü, ta metetdaksü.



Mahadev tenüng nung sen asayaba app ang ka tenzük. Parnoki aaktsüla, kechiyong parnoki Mahadev tenüngbosa mamshitsüla liasü," ta Shah-i ashi.

State nung BJP sorkar arura enquiry commission ka tentetsü aser ochimashi mapa nung shilem agir ajak jail nung puoktsü, ta paisa metetdaksü.

Mongolbarnü Chhattisgarh nung assembly election mezüngbuba shilem menden 20 atema agiogo aser aser tanüngba menden 70 atema election tanabuba shilemji November 17 nü agiba sülen December 3 nü vote azüngtsü.

Chhattisgarh kübok Jashpur constituency nung election nüboyim senden ka nung jembidang Amit Shah-i Chief Minister Bhupesh Baghel-i aniba sorkar aitsü.

Chhattisgarh nung ochimashi liasü aser Baghel-i aniba sorkari sen crore meyirjang aika nung ochimashi inyakogo, ta pai metetdaksü.

"Centre nung Modi-i aniba sorkar kübok 'Chandrayaan' itai yok aser iba tesem dangji Lord Shiva nüngtem nung Shivshakti jaloktsü. Ajisüaka Chhattisgarh nung Congress sorkaribo

Shah-i, Ato kilonser Narendra Modi leniba nung Centre sorkar kübok ita nung 'Chandrayaan' anendaksütet, aser iba tesem dangji 'Shivshakti' ta jaloktsüogo, ajisüaka iba mapang nungji state nung Congress sorkaribo 'Mahadev' tenüng sen asayaba app ang adok, ta aitsü.

Chhattisgarh nung Congress sorkar maneni aija Shah-i, tesüiba küm pongu tsüngda nisung aika tamangba yimsü meyipdaksüogo, ta ashi.

Shah-i lokti dang, state nung gol ana aketba sorkar (Centre aser state naprongla nung BJP sorkar) amenoktsü mepishiba den külemi sorkar state nung küm pongu tsüngda Maoists telungpurtem samatsütsü, ta nangzük.

Tesüiba küm pongu tsüngda

Qatar nung India Navy officer 8 atema India-i temepishiba agütsü

New Delhi, Yimpoksüi/ November 09 (Agencies): Taoba ita Qatar nung aliba court kati taoba mapang Indian Navy nung officer 8 nem tasüba temerenshi obendang agütsüba sülen India-i parnok atema temepishiba ken o ka agütsüogo, ta Brihostibarnü Ministry of External Affairs (MEA)-i metetdaksü.

Ministry of External Affairs (MEA) otongdar, Arindam Bagchi-i, pua aliba India nung ajurutsü atema Doha nung aliba Indian embassy nem temelaba agütsüogo, ta metetdaksü.

Bagchi-isa, navy officer temji maneni India ketdangsertemi nungita yaritsü, ta metetdaksü.

New Delhi nung osangbenertem den jembidang pai, "Iba ken o dak sendakba nung temepishiba ka agütsüogo," ta metetdaksü.

October 26, 2023 nü Qatar nung aliba Court of First Instance-i taoba mapang Indian

Navy officer 8 nem tasüba temerenshi obendang agüja liasü. Parnok tipronglaji tesüiba küm ka tashi Qatar nung aliba jail nung liasü.

India sorkari iba osang angashia aoksaba osang lemsatepba den külemi parnok kümzüktsü atema sorkari akokba tashi legal tsütsü teyari lenmang bushitsü, ta metetdaksüogo.

Yaküm August ita nung Qatar ketdangsertemi taoba mapang Indian Navy officer 8 ji apu.

Parnok Qatar nung aliba company ka nung inyakba mapang parnoki Israel nung atema itdangitsüba mapa inyakogo, ta melung melemi parnok apu.

Parnoki Qatar ketdangsertem dang bail nung chiooktsü aiben mepishi saka magizük.

Qatar ketdangsertemi, India nungertemji anema parnok ket nung electronic kuli lir, ta shiogo.



Madhya Pradesh nung Assembly elections agitsü mapang ana nung lia November 09, 2023 nü Chitrakoot nung Congress General Secretary, Priyanka Gandhi Vadra-i lokti senden ka nung jembidang tangokba noksa nung angur.

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

[Rule - 8(1)]
KIOJEN AGIBA NOTICE

Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaker tsünglanglen sign süa aliba State Bank of India officer-i 22.08.2023 anogo nung Demand Notice ka ajanga sen apur **Shri Vitoshe Sema** dang notice agütsüba anogo nungi tenzüka anogo 60 tsüngda notice nung shia aliba ama sen 23,33,583.09 (Rupees Twenty Three Lacs Thirty Three Thousands Five Hundred Eighty Three and Paise Nine only) agüjang, ta tuyua liasü. Ajisüaka sen apuri senji magütsütet nung sen apur/Guarantor aser nüburtem dang tsünglanglen sign süa aliri iba Act kübok Section 13(4) aser **Rule 8** nung agüja aliba tashi amshia 2023 küm November 08 nü tsünglanglen shia aliba kiojen agiadokogo, ta sangdonger. Sen apur/Guarantor aser nüburtem dang iba kiojen dak sendakba nung kecha inyakshangshi masütsü metetdaksür aser kari danga tetuyuba anema inyakra State Bank of India-i sen 23,33,583.09 den 23.08.2023 anogo nungi tenzüka tetemlok meshitsü. Sen apur dang iba Act nung Section 13 kübok sub-section (8) nung aliba ama mapang shidak nung item kiojen alanzüktsü atema inyaktsü metetdaksür.

Kiojen osang teiangja:
Darogapathar (A.K), Under Mouza No.-03, Dimapur, Nagaland nung Shri Vitoshe Sema tenüng nung aliba Patta No.612, Dag No.134(A)/824 agi ayimjema kimong tasazük 00B-03K-02L nung aliba kiojen ajak den RCC building ka

Bounded By :
North tsütsülen : Solhilo Kapfo, South tsütsülen : Approach Road,
East tsütsülen : Nallah, West tsütsülen : Approach Road.

ANOGO : 08.11.2023
TESEM : Dimapur

AUTHORISED Officer
(State Bank of India, SARB Jorhat Branch)

Tzurangkong Arogo Tenzuker Telongjem Penalty Shootout
Organised By: Tembayim Committee

1st Prize : Rs. 25,000
2nd Prize : Rs. 20,000
Best Keeper : Rs. 5,000

Exhibition Match for Board of Deacon

Last Date of Submission of form : 7th Dec 2023

Registration Rs. 1000/- For Detail Contact : 6909869359
8837206345
9862275067

Date: 12 Dec 2023 Venue: Chungtiayimsen Local Ground

No more delays in loan processing...

Register and share your financial information with lenders through an Account Aggregator in a secured manner today!

RBI Kehta Hai...
Jaankaar Baniye, Satark Rahiye!

Issued in public interest by
भारतीय रिज़र्व बैंक
RESERVE BANK OF INDIA
www.rbi.org.in

For more details, visit <https://rbikehtahai.rbi.org.in/aa>
For feedback, write to rbikehtahai@rbi.org.in



TIR YIMYIM YIMOBILEM (EDITORIAL)

DIMAPUR ROGONÜ, YIMPOKSÜI (YIMPOKSÜI) 10, 2023

Hornbill agi longjemtsüla

Nagaland nung alir Naga nungger ajak külemi amungtsü atema tenzükba hornbill benjongmung nung Nagaland anüdoklen alir kintembo madentsü telemtetba agiba agi hornbill benjongmung melongsutsüsa jangramatem kümdaktsüogo. Anungji, ibaji khen meyipa reprangshir tang monga aruba ama tesem ka nung dang mesüaka Nagaland tesem ajak nung külemi mapang ka nung iba hornbill benjongmung ya among ajung asü majung ta bilemdangtsü mapang kati bentsür arugo. Nagaland anüdoklen alir kintemia hornbill benjong amungba ya majung ta ashir masü mesüra mamongtsüla ta ashir-a masü saka Kohima anasa Kisama nung dang masü saka Nagaland anüdoklena kasa mapang nung kasa benjongmung ya amungtsüla ta akanger amai angateter. Ibaji tebilemba tajung, kechiaser tesem ka nung dang masü saka Nagaland tesem ajaklen kasa benjong ya mapang ka nung dang külemi mungra Nagaland ajunga lungsutsü aser district ajak ajangzüksü. Ano kuli kaji, Naga nungger benjong süra Naga lima ajaklen külemi mapang ka nung amungtsüla. Ajisüaka, tangbo hornbill benjongmung Kisama nung dang amungba ya Christmas ser nung Kohima nung dang amung amai lir. Ano, tebilemdangtsü kaji, akhi sobaliba benjong den reptepa 'mini hornbill' ta ser amungba ya kecha tetezü maka ser hornbill agi asenok tsürabur sobaliba aser otsü tajung amoksepdaktsür asütsü. Nagaland ya tilaka saka kin aika aser kin shia oshi, yartsüngsang aser benjongbentsü amongba sobaliba balala, anungji küm nung khenbo Nagaland nung aliba Naga kin ajak külemi amungtsü atema benjongmung tasen ka amungtsü tenzükba sentong ya junger. Ajisüaka, iba hornbill benjongmung yabo tanga Naga nungger sobaliba benjong amato masü saka Kohima nung dang Naga kin ajak jaoka amungtsü tenzük. Aji oda, tamasa Kohima local ground nung lia tenzükba nungi tangbo iba benjong amungtsü atema yim tasen ka kümteta yur yangji amunger. Iba yim dangji Kisama ta ajar. Joko, iba Kisama yimtak küm shia December ita tetenzüklen hornbill benjong amungba ya alima ajaki meteta kümogo, anungji tang ama November ita nungi Kohima aser Dimapur nungbo bendang lima tesem balala nungi hornbill benjong reprangi arurtem anenzüksü atema hotel ajak jelia mekaa ayur aser November ita tatembanglen nungibo India nung yimti balala nungi Dimapur-i aruba tayimtsü ticket jengang dena onketa atutsü. Iba hornbill benjong yabo tanga Naga nungger tsüraburtem mapang nungi munga aruba benjong memesük saka shishilembaba mapa dena lir, anungji iba benjong yabo angati chiajema pelatepba akhi sobaliba benjong amato masü, saka ajak sen agidang alia chiaajemtsüba benjongmung sentong ka lir, anungji iba benjongmung yabo shishilembaba benjongmungang ka mesük, ibayongjiang nisung aika iba benjongmung nung chiyongtsü aser osettsüset ayokba ajanga senotsü ajangzüker. Atangji, ibaji government-i ayongzüka hornbill benjongmung amongba nükjidong lir. Aji oda, benjong lungsutsü aser nisungtem puatsü atema iba benjongmung tepiyong Naga kin shia anogo balala lemsar tesem ka nung yartsüngsang amunger aser tesem balala kentenmenü aser tetoktepba sentong balala ayongzüka amunger. Ano, iba benjongmung nung tebilemdangtsü kaji, arogo nungertemi piyazü enoka yangluba yi talubosa amshir saka arogo aser mungdangi mangu amai toktsür. Atangji, limapurtemi piyazü enoka yi saa ayokba aser ajemba atema kecha mali saka arogo nungertemi yi saa yi ayokbajibo arogo nungi endoktsüla, aji mesüra arogoi arogo nungertemi yi yangluba aser ayokbaji shitaka ta ajungshir asütsü. Item ama reprangtetba temelenshitsü kar den Nagaland anüdoklen alirtemi ashiba amaji, Kisama nung dang masü saka Nagaland nung district headquarters shia nung Naga kin ajak külemi jaoktepa hornbill benjong ya mapang kasa nung mungra, benjong agi Naga nungger longjemdaktsür asütsü aser bendanglen nungi arur raliwalirtema Kisama nung dang masü saka tanga district-tem nunga oa amungtsü maongka angutsü. Atangji, taküm küm atemabo menuogo saka sangküm küm Nagaland ajaklen kasa mapang nung hornbill benjongmong amongtsü sentong renemtsü atemabo mapang peria lir.

OLEMSABANG

Ao Naga Tenem nung Baptist arogo Tenzükba

~ Rev. Temsü Imchen, Asso. Professor,
Discipleship Bible College, Dimapur

(Yashi adok nungi...)

History tangatetbaren nungibo arogo anaprongla Jubileeji kasa küm nung amongtsü teratetba agütsür. Arogo ana tetenzük history ya ano tamanger telok American Baptist Mission, CBCNEI, NBCC, aser ABAM history lir. Anungji Arogo Otsü zülur mongintemi ashiba amaji arogo anaprongla anogo asetshiteper (adjustment) tobur junga mongyonga aotsü tangatetba tuyur.

History asoshi anogo aser tatalokba ajakji kasa dang tongtipang lir, saka item dak alaka ano tatalokba mapa aser item anogo nungi kechisa temelenshitsü tajungtem nübурtem asoshi bener arutsür itemji ang mezüngbuba tongtipangba (primary) kümdaktsür. Tatalokba aser anogotem (events, dates) ji tanabuba jengang (secondary) nung yutsür. 1872 küm nung Molungkimong yimtsüng nung aliba tsüraburtem, Süpongmereni anir parnoki Christian missionarytem, Gudhula aser Dr. Clark na jaoka Christian yimsü Ao Naga lima nung tenzükdaktsübaji kanga dang tongtipang tatalokba lir. Parnok mapa ajanga tanü temoatsü agidagi aser alima matem tashi agitsü.

Yim ana tetsü-teboui iba yimsü Ao Nagalimai bener aruba, aser iba nungi anguba temoatsü asenoki küm 150 ajungba Benjong sadem sadema memongtetba atema kanga sasaseter. Anungji tang nungibo arogo anaprongla kecha tetsükdaktsü makai Jubileeji sadem sadema mongdaktsütsü asenoki yaritsüla. Ibai Christian doctrine mesüra theological controversy kar nung sentaka ali asübo timtem adokla. Arogo history tangatetba tsütsülen nungibo onok arogo Jubilee koba küm amongtsüla ta tangar dang asüngdangtsü nüngdak madoker. Ibai Baptist arogoi agizüka benschia aruba, "Autonomy of the Local Church" nungi tali terajemba angatettsü.

Molungyimsen maküm tashi 1876 yimtsüng ka nung dang tamangertem ajakji liyonga aru. Anungji arogo anapronglai arogo otsüji ka ama dang zülutsü nüngdaka liasü. Dr. Clark-i anir yim tasen aküm dang aortem aser maortem tsüngda pei ajangzüksü aser talisa yimsen akümi aortemi Dr. Clark-i bener aruba yimsü tajungji mesamadaktsütsü atema pei telidak ki-o-jen, yokya sonü, kimung lumong ajak toktsür yim tasen nung alitsü mulungtetba nungji tangatettsü aika densema lir. Item kulitemji kar akoktsü aser kar medentsü tebilemba aser nükjidong nung masü, saka tali rajemshia tangatetba tasen aser tajungba kati arutsü teimla nung yariteptsüla.

Ao Naga tenemi Yisu yimsü aruba aser Molungyimsen yim akümba otsüji akhidang Aor yim akümba den khenyongi balaka ta angatetdi. Collingwood history tangatetbaji historyji terenlok (history as progressive) ta ashibaji iba tsütsü angatettsü ta imlar. Anungji joko arogo ana lungjemer katia ka support sütepa arogo otsüjia zülutsüla, aser mapa karbo külemi inyaktsüla. Arogo ana otsü züluyim dang masü (historiography), saka asen Ao arogotem otsü züluyima tali teratetba, terajemba aser tabensaba nung zülutsü merangteptsüla.

Tatem nung ano ibai lepshia ashir, Molung arogo anaprongla atema 1872 December 22 ji Ao Naga tenem nung Yisu Khrista yimsü agizükba anogo ama arogo anaprongla pelatepa Jubilee amongtsü nüngdaker, aser idakji shingia teka aitsü makok ta Church-History nung tangazüker ka aser tesayur ka ama nibo shiteter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung rara ajanga jenshirtem Arogoi yarir



Myanmar nung rara ajanga Tenla kidang jenoka alirtem noksa nung angur.

November 09, 2023: Myanmar linük nung ano rara tesashiba akümba ajanga Khristantem densema nisung meyrjang aika ajener; ajioda Arogoi ki toktsür ajenertem yaria jenokdaksür, ta osang tasen ka ajanga metetdaksü.

Taküm October 26 nungi tenzüka Shan state nung sepaitem aser sepa yimsüsüba anema nokdakertem tsüngda rara tesashiba akümba sülen Khristantem teimba ser nisung 600 shi Lashio jila nung aliba Tenla ki aser Catechist's center nung jenoka lir.

Lashio nung aliba Arogo nung züngsem, Edward-i, "Arogoi Lenten mapang nung tenla aruba aser Arogo senpong nungi parnok nem teyari agütsütsü meranger," ta metetdaksü.

November 08, 2023 nü osangbener den jembidang pai, Lashio jila nung aliba Baptist Arogotem indang Tenla ki aser

Buddhist monasteries nunga nisung noklang aika jenoka lir; lokti tentet balalai aser nijatemi parnok nem teyari agütsüdar, ta metetdaksü.

Edward-i, Arogo nung inyakerteri tesem kar nungbo local Arogotem ajanga senotsü dang agütsür, kechiyong item tesem jagibo tonga mouteter, ta metetdaksü.

Lashio nung aliba Arogo kübok Hsenwi jila nung aliba Arogo ka nungbo putirtem, nun tem aser Arogo züngsemtem ajak jenshiogo. Iba Tenla ki aser convent naprongla sepaitemi shells amshia amakba ajanga aika jenshi.

"Iba tatalokba nung nisung shinga masü, saka putirtem aser nun tem anasa aliba tesem ka nung jenoka lir," ta Arogo osang ka ajanga metetdaksü.

Ano nisung meyrjang ka shibo Laukkai jila nungi ajenba mapang nung timtem ajurua len tom nung dang lir; iba jila ya

China den arrtsülen lir.

United Nations (UN)-i, tesüiba hopta ana tsüngda Myanmar nung asentenshir raraba ajanga tensa ano tamajungba kümogo, ta metetdaksü.

November 06, 2023 nü osangbenertem den jembidang UN Secretary-General atema otongdar, Stephance Dujarrice-i "October 26 nungi tenzüka tang tashi nung tetsür-tanur densema nisung 33,000 jenshiogo. Ibayongji nisung aikati teyari nüngdaka lir," ta metetdakja liasü.

Ta'ang National Liberation Army, Arakan Army aser Myanmar National Democratic Alliance Army-i longjemer sepaitem anema "Operation 1027" tenzüka sülen Shan state nung tensa ano tamajungba kümogo.

Telok asemji longjemer military post 100 shi amak aser Chinshwehaw jila densema jila pezü nung sepaitem amak.

Reshikangshi tamajungba akümyonga Khristan nütsüng arener

November 09, 2023: Alima tesem ajaklen Khristantem reshikangshiba jenjang tamajung akümyonga alima tesem aika nung Khristan yimsü maneni proker aser nütsüng teimba akümer, ta osang ka ajanga metetdaksü.

Khristan melunget telok International Christian Concern (ICC)-i 2023 "Persecutors of the Year" report ajanga alima nung Khristantem tamajungtiba reshikangshiba linüktem, teloktem aser nijatem osang tejangja metetdaksüogo.

ICC-i ashiba agi, tang alima tesem balala nung reshikangshi ajangshiba Khristan million 200-300 shi lir; Khrista sülen anidakba agi Khristantem apur, reshikangshir mesüra tepseter.

ICC Tir Jeff King-i, tanü alima nung Khristan ka asütsü atema linük tamajungtiba

rongnung kaji Nigeria lir; iba linük nung Boko Haram, Fulani telok aser Islamic kiralongrartemi Khristantem aika apur, reshikangshir mesüra tepseter, iba dak alia Tenla kitem aser Arogo kiojentem rongdoktsür, ta metetdaksü.

"Anüolen linüktem sobaliba samatsütsü nükjidong nung Islamic Sharia ozüng tesashi benoka Boko Haram aser Islamic State West African Province (ISWAP)-i Khristan meyrjang aika tepsetogo aser nisung million aika jenshiogo. Ajisüaka iba region nung Khristan nütsüng million 100 shi renlokogo," ta pai metetdaksü.

ICC-i renemba report ajanga ashiba agi, "Tang alima nung Arogo tekeratiba ainba tesem rongnung kaji Islamic Republic of Iran lir. Iba linük nung nütsüng shilem 99 bo

Muslim nunger lir. Iba linük nung Khristantem kanga reshikangshir."

ICC report ajanga ashiba agi, Iran nung Khristan nütsüng kanga renloka tang iba linük nung Khristan 500,000 nungi 800,000 shi lir.

China nunga mimshia Khristan yimsü amanger million 70 nungi million 100 shi lir. Communist linük nung yimsü temeden magütsür, kechiyong yimsü temeden agütsübaji linük security atema amokmeren ka ama parnoki züngshir, ta ICC report ajanga metetdaksü.

China nung ketdangsertemi House churches anema inyaker; talisa sorkari melaba telok nung register masüba Arogotem anema inyaker. Ano Arogo kar nembo registration-a magütsür, ta International Christian Concern-isa metetdaksü.

ANO GO ABEN TSÜNGREM DEN

Tenüng Asangba Kongki Ka

T.Ken 150: 1-6

Laishiba nung ken kaket Tenüngsang Kenji lir aser ken züluri tatem tenüng asangba aser tekülem indang asenoki metettsü Tsüngremi aginer ta tatsü agi jangjatsür. Khristan tamangji ken atenba aser tetushi agütsüba tamang lir. Asenok akaba ama tanga tammangba yimsü nung tenüng asangba aser ken atenba mali, kechiaser asenok mulungjang nung asenok Kibuba kenkar. Ken züluri iba ken nung tasüngdangba kar langzür.

Asenoki asangbaji shiba? "Kibuba sangang" (t.1) - arogo masü, sayutsünger masü saka Kibuba. Asenok tebilemetsüji asenoki aiben Kibuba mangur. Asenoki Tsüngrem nungi sempet anguba mesüra manguba repranger. Asenoki ashir, "Kechiba Kibubai ya meinyak, mesüra kechiba ibai balaka inyak?" Asenoki Pa shidakba mangur. Asenoki sempetji atema tagütsür dangi odi. Asenoki temoatsüji atema moatsüsang dangi odi. Asenoki Kibuba sangdi. "Teti Kibuba nung pelaang; tanabena ni shiti, pelaang!" (Filipi 4:4).

Asenoki Pa kong asangtsü? "Pa temeshidak Tsüngrem sangang, anüng ali tsüngda nung Pa ain asoshi tenüng sangang" (t.1). Koda jangratemtsü teloktep ka. Kodang asenoki tenla kidang Tsüngrem tenüng sangdir, ibai kotak nung tenyartemi tenüng asangba ama lir. Tekülemdak mesüra kechi nungsa asenok lidir, asenoki Tsüngrem tenüng sangdi.

Kechiba asenoki Pa tenüng asangtsüla? "Pa tashi tulu mapa asoshi Pa sangang: Pa kanga uluba asoshi Pa sangang" (t.2). Pa kechi aser Pai kechi inyak iba asoshi asenoki Pa tenüng asanger. Asenoki Pa koda asangtsü? Jangzü ola agi, tzürang kongki aser tawaba kongki agi, asem atemba agi, tsüngsangba agi, lisü aser jemji kongki agi Pa sangang. Ken züluri ashir, "Kongki ajak bendenang. Nai akok tashi kongki bendenang aser asenoki Kibuba sangdi". Kari ibaji maginür, saka asenok dang Pa ola tulu agi külemtsü ozüng agütsü.

Tanü yimya ajaki Kibuba tenüng asanger saka nüburi Pa amadoker. Ne sasa ken 150 nung tenüng asangba indang asüngdangang aser ken züluri langzüba shisadangang. Nai aika nung tenüng asangtsü kar. Pa tenüng asangba ajanga Tsüngrem mulungjang nung tepela bener arujang.

Khristan yimsü agizükba agi kinüngbui kinüngtsü dak mi senoktsü

Nairobi (Kenya), November 09 (Agencies): Uganda linük nung tetsür kati Khristan yimsü agizükba agi la kinüngbui la dak mi senoktsüba agi la mi agi mejungi ronger hospital nung mongdar.

Budaka jila kübok Kenkebu yimdam Muslim tsür arrshi küm 32, Hajara Namwase-i Khristan yimsü agizükba sülen October 17 nü la kinüngbu, Musa Kalele-i la dak totzü shiloktsür mi senoktsü, ta lar medemer kati metetdaksü.

La kinüngbu South Sudan-i oa aliba mapang nung Namwase-i May 3 nü Khrista agizükba sülen Khristan fellowship ka nungsa dena aru. October 17 nü la tekülem sentong nung adenba sülen kidangi meyipa arudang la kinüngbu ainlen nungi shilanger liasü.

Namwase-i, "Ni pa ngua kanga tsüba, kechiyong kü ket

nung osangtajung kakettem aser Tasen Lai ka bena liasü. Laishibaji anguba sülen pa kanga jashia takdang nungi ao aser totzü bener aru. Pai sü agi ni meyibang aser kimai atsüzükba sülen kü dak totzü shiloktsür mi senoktsü," ta metetdaksü.

Lar jalai kiyongertem nem iba osangji metetdaksüba sülen kiyongertemi la kümzüka Mbale Regional Referral Hospital-i anir ao. Iba sülen October 24 nü la Kampala nung aliba hospital kati anir ao. La kinüngbubo South Sudan-i jena ogo.

Namwase kanga shisabulur, kechiyong la aneper hospital toktsüdang kong jenoktsüar memetet, kechiyong lar kinünger ajak Muslim nungertem lir aser lar chir asemji arrshi küm 9 ser tekübokpurtem dang lir, lar medemeri metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Scütsüprak

(adv) kanga tagidak makaba nisung (worthless person)

* Scütsüprak nisungi shinga meyariteter.

Scüzü

(n) arem nung meyiba süngzü, tsüksara scü menemer (skunk vine)

* Scüzü ya arem ajak nungbo mangur.

OLONG PAITEP # 6611

1						2				3
								4		
5		6				7				
8										9
									10	
					11		12			
			13							
14										
					16					

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüc asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6610 TELANGZÜBA

TIPIEN :

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen, 15. Kioktsü,
- 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü,
- 4. Kua, 5. Mitsüktsü,
- 6. Azübenshi, 8. Lah,
- 9. Jangkok, 12. Akok,
- 14. Nashi, 16. Sür.

NAI-A YA METETTER MA



Alima nung nisung tekong (neck) talangtiba ya inches 7.7 tashi lir aser item nisung ya Thailand northwestern tsütsü Padaung kin nungi tetsürtem lir. Ibai nisung ka tekok anaben metentepba den sako lir. Sobaliba yimya ka ama, iba kin yagi tetsür arishi küm pongu nungi toku tsüngta tekong nung yongmen yin taret inoker aser tain akumdang iba yin tali inoker.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Assam nung railway station ana nem 'Eat Right Station' certification agütsü



Rangia railway station

Guwahati, Yimpoksüi/ November 9 (Agencies): Assam nung railway station ana nem "Eat Right Station" certification agütsüogo. Passenger tem nem jenjang aketba chiyongtsü tajung agütsüba atema iba certificate agütsüogo.

Northeast Frontier (NF) Railway kübok Assam nung Rangia aser Mariani railway station nem FSSAI (Food

Safety and Standards Authority of India) "Eat Right Station" certification agütsüogo.

Item station ana yagi FSSAI-i tetuyuba agütsür aliba sülen shitak anidakteta liasü, ta ketdangsür kati ashi.

Taoba mapang NF Railway kübok Guwahati, Harishchandrapur aser Lumding railway station tem nem FSSAI-i "Eat Right

Station" certification agütsüogo.

Standard food storage aser merekmejua chiyongtsü amshiba dak ajemdaker FSSAI-i "Eat Right Station" certification ya railway station tem nem agütsür.

Passenger tem nem jenjang aketba chiyongtsü temerek agütsüba atema railway station tem nem FSSAI-i iba naroküm ya agütsür.

Manipur nung Kuki-Zo nunger ana tasümang ngutetogo

Imphal, Yimpoksüi/ November 9 (Agencies): Manipur nung Kuki-Zo kin nungi Indian Army sepai kaer kinunger pezü pur aoba rongnung ana tasümang security forces-i ngutetogo.

Kuki-Zo nunger parnok pezü ya November 7 nü Kangpokpi district kübok security check post ka nungi Meitei nunger lokti kati pur ao.

Parnok ya Manipur kübok Kangpokpi district nung sati benjung ka nung shilem agütsü atema L Phaijang yimtsüngi oya aliba mapang pur ao.

Par pezü pur aoba ajanga Manipur nung asendenshir khatap tenzüka den longkak ait tenzüko.

Manipur police inspector general (IG) Themthing Ngasangva-i ashiba agi, tasümang ana (tetsür ka aser tebur ka) ya Mongolbarnü (Nov 7) nikongtsütsü nguteta liasü. Pur aor rongnung ano nisung ana tang tashi monguteti lir.

Parnok rongnung Indian Army sepaisang indang arishi küm 65 tain tebu-bo security forces temi kümzüko aser pa kanga mejungi yirur liasü.

Pa Bodhbarnü Guwahati nung amendaker aliba military mozüki kati tayimtsü ajanga anirogo.

"Tetsürta tekolak nung injang

agi akhaba zübu liasü," ta Lamsang police station officer-in-charge (OC) Sanjoy Meitei-i Scroll dang ashi.

Paisa, "tetsürta ya Kuki tsür asütsü ta bilemer. Tasümang ya Imphal kübok RIMS hospital mortuary nung yua lir. Tetsürta tepsetba anema onoki ken o ka benokogo," ta ashi.

Tanabuba tasümang ya Kuki nunger ka liasü. Pa tasümang ya Imphal East district kübok Takhok Mapal Makha Puruksoubi Loukon Palli tesem nung nguteta liasü.

"Tasümang nung injang agi akhanba tarak teku nung ana aser tekolak nung ka lir," ta Irilbung police station OC, Inspector Poujeanlung Panmei-i Scroll dang ashi.

Kasa mapang nung Indigenous Tribal Leaders' Forum (ITLF)-i, Manipur nung Biren Singh-i aniba BJP sorkar aitsüogo aser ashiba agi parnoki state nung nütsünyongsük agi ajema aliba kintem samatsütsü meranger.

Iba olen ya ITLF-i Mongolbarnü lemsatepa liasü.

Manipur nung yimjung mebenoktetba atema centre sorkar aja ITLF-i ashiba agi, "state nung sorkar azioker aliba lokti tentet tulubai nütsünyongsük agi ajema aliba kintem samatsütsü merangba

mapang mepetmesü nung shitakba akoksartem temeden aser taküm kümzüka toktsütsü asoshi centre sorkar mapa lir."

Parnoki Manipur nung tribal tem atema administration balaka akhangba nenshia liasü.

"Onok samatsütsü merangertem nungi pila alitsü asoshi onok atema administration balaka nungdaker," ta ITLF-i ashi.

"Onoki centre sorkar dak anogo ka nung ka ta tamang makaba kümдар," ta ITLF-isa ashi.

Maneni Manipur nung tenem nung aliba district ajak nungi Meitei state forces agintsü atema mepeshiba union home minister Amit Shah-i sentoka toktsür, ta ITLF-i ashi.

"ITLF-i Delhi nung home minister Amit Shah ajuruba mapang onoki tenem nung aliba district tem nungi Meitei state forces agintsü takhangba agüja liasü. Minister-i onok temepeshiba magizük saka state force parnok jurila inyaksangshitsü memelatsü aser tenem nung aliba district tem nung parnok central forces den longjemer inyaksangshidaksütsü ta tenangzüka agüja liasü," ta ITLF-i ashi.

Ajisüka tawa tatalokbatem ajanga iba tenangzüka ya benoka inyaksangshiba merprangteter, ta parnokisa ashi.

Mizoram: Aizawl South-III constituency nung repoll asütsü



Aizawl, Yimpoksüi/ November 9 (Agencies): Mizoram nung Aizawl South-III constituency kübok polling station ka nung November 10 nü anepdang 7 ako nungi nikongtsütsü 4 ako tashi vote agütsüshitsü, ta ketdangsür kati metetdaksü.

Mongolbarnü vote agütsü

metenzük tsüngda polling ketdangsürtemi mock-poll clear mesütsüba atema vote agütsüshitsüsa kümogo, ta prnoki ashi

Ketdangsürtemi ashiba agi, Bodhbarnü state ajunga nung post-poll scrutiny agi aser iba mapang Aizawl South-III constituency kübok

Muallungthu polling station nung shitakba vote agütsü metenzük tsüngda mock poll clear mesütsüba nguteta liasü.

Iba dak ajemdaker constituency indang Returning Officer-i Election Commission dang temelaba meshi, aser EC-i Muallungthu polling station nung November 10 nü vote agütsüshitsü atema tetuyuba agüja liasü.

Muallungthu polling station nung tetsür 548 densema voter 1,084 lir.

Mizoram nung menden 40 atema election Mongolbarnü kanga süngjema agiogo aser voter shilem 80.43-i vote agüja liasü.

US-i Syria nung hadir yua aliba tesem amak

Washington, Yimpoksüi/Nov. 09 (Agencies): Syria anüdoklen Iran indang Islamic Revolutionary Guard Corps (IRGC) aser Iran-i yariba teloktemi amshiba südi ta temolung melemi aliba hadir ayudaj tesem ka United States-i amak.

US Defense Secretary Lloyd Austin-i Bodhbarnü sangdong ka nung ashiba agi, tawa US sepaitem dak amakba telangzüba agüja air force indang F-15 fighters anati "self-defence strike" mapa inyak.

"Tir asoshi US sepaitem kumzüka ayutsüba dang temaba mapa mali, aser tanü United States-i pei sepai, pei tejangraba kumzüka ayutsü ta tejangja sayua tanü inyakba atema

totuyuba agüja liasü," ta sangdong ajanga ashi.

October 7 nü Israel-Hamas rara tenzüka sülen tensa mejungi aliba mapang Iran-i yariba sepaitemi Iraq aser Syria nung ozü sepai aser tembarten dak 40 ben makogo aser iba mapang sepai 45 tera yirutsü, ta Washington-i ashi.

US sepaitem dak amakba sülen Syria nung IRGC aser Iran den sendaktepa aliba facilities ana nung US-i amak, ta Pentagon-i taoba ita tatemlen shia liasü.

Bodhbarnü sangdong nung Austin-i iba ama lendong agütsüba anentsü ajungshia liasü. "Ozü nübur aser ozü facilities kumzüka ayutsü atema nungdakba mera agütsü United


States renema lir. Tensa tamajungba mekumdaktsütsü onoki ajungshir," ta pai ashi.

Syria nung US sepai 900 lir aser Iraq nung 2,500 lir aser parnok ya ISIL (ISIS) tem asendenshiba nokdangtsü merangba sepaitem yaritsü asoshi oa lir. ISIL (ISIS) yagi 2014 küm linük anaprong nung tesem tululu rakzüik saka tatem nung par madak takok angu.

US-i amakba ya Israel-Hamas rara den sendaktepa mali, ta ashir.

2006 küm nungi Gaza nung yimsü asüba Hamas aser Lebanese armed group Hezbollah telok anaprong ya Iran-i yarir, shirnoki Israel-Lebanon arütsülen Israel anema lendong agütsür.

KÜM 98 AJUNGBA TEPELA ANOGO



T. SHILUCHIBA JAMIR
(Changtongya town)

Tsüngrem temeim aser taochi nung ozü tzürabur küm 98 tashi arishi moatsüba asoshi Pa tenung asanger, maneni Pa akhümdong nung onok alitsü, Tsüngremi ozü tzürabur nem anema aliba aser arishi talang moajang ta onok sarasadem.

"Aser oda asatao tonga ni ano kasa lir, nenok kupu mapu tashi ni nenok abentsü. Ni yangluogo aser ni apungtsü, ni abentsü aser ni kümzüksü." – Isaia 46:4

*Temeim Kinüngtsü, Chirnür,
Semchirtem aser Anükapang.*

Pakistan-i Afghan Taliban meyaritsü

Islamabad, Yimpoksüi/Nov. 09 (Agencies): Afghanistan-i nokdanga aliba Tehrek-e-Taliban Pakistan (TTP) kiralongraba telok menokdangtetba sülen Pakistan-i international jenjang nung Afghan Taliban meyaritsü aser teyari kecha magütsütsü telemtetba agiogo, ta Brehostibarnü sangdong ka ajanga ashi.

Kasa mapang Islamabad-i interim Afghan Taliban sorkar nem 'special privileges' kecha magütsütsü ta ashi, koba ajanga kidanger linük ana tsüngta tesendaktep tamajungba akumba ajiteter, ta The Express Tribune osangkaket ajanga ashi.

TTP ya tangatetba tsütsü Afghan Taliban den sendaktepa lir aser parnok dang Pakistan Taliban ta ajar aser 2007 küm telungpur telok balala lungjemer tenteta liasü. Afghan Taliban yimsüsüba mendeni aruba sülen parnok TTP züngsemtem aridoka Pakistan anema mapa tamajung inyakba nung par li mamshitsü Pakistan teimla liasü, saka Islamabad den tesendaktep majungba mechi yamaji inyaksü memolunger amai ajiteter.

Pakistan-i par policy melenshiba ajanga tetsükdaktsü mezüngbubaji Afghan Taliban sorkar alimai agizüksü aliba maangka kanga tajemba akumba ya lir, ta Express Tribune osangkaket ajanga ashi.

2021 August ita yimsüsüba mendeni aruba sülen Pakistan-i yimya tajung sayuba aser Afghan Taliban sorkari nem teyari agütsüba parnok züba-züba agizük, ta ketdangsurtemi iba osangkaket dang Bodhbarnü shia liasü. Taliban yimsüsüba mendeni meyipa aruba sülen Pakistan ya par teyarir tajungba akum aser alima balala dang aser talisa anüolen linüktem dang Kabul nung yimsüsür tasanba den amalitep akatsü ajungshia liasü.

Afghan interim government indang odongtar ama Pakistan-i inyakba ya aiben linük telungzük aser bendanglen nungi aija aru. Ajisüaka iba mapang ketdangsur temi par temeden bushia jembia Afghan

Taliban ya shidakba aser parnok den inyaksüba dak alaka danga lenmang kecha mali ta shia liasü.

Afghan Taliban sorkar nem temerenshi aser tenokdangba agüja aliba agientsü aser US-i soita aliba senotsü amshitsü asoshi Islamabad-i region nung tongtipang linüktem den jembishinüa liasü.

Ano Afghan interim government yaritsü mechi Pakistan-i shishilempaba aser danga facilities tsütsü Afghanistan nem teyari aika agüja liasü. Saka tangbo Pakistan-i Afghan Taliban sorkar meyaritsü ta ashir, kechiaser parnok tsükchir anidener.

Parnok nem shimtsü lenmang agütsü saka parnok Pakistan melen TTP ang shim amai ajiteter.

Ajisüaka Afghan Taliban sorkari danga linük amaktsü asoshi telungpuri par li mamshir aser Pakistan indang security tebilemtsü ya par mapa lir ta Bodhbarnüa nenshia ashi.

Pakistan nung yimjung alitsü asoshi Islamic Emirate of Afghanistan mapa masü, ta Afghan Taliban sorkar indang odongtar Zabihullah Mujahid-i ashi.

Par kilung tebilemtsü par sasa bentettsüla aser par tamakok atema Afghanistan tenung masentsüla, ta pai ashi.

Gaza amakba manenra region nung rara tenzüksü: Hezbollah

Beirut, Yimpoksüi/Nov. 09 (Agencies): Lebanon nung Iran-i yariba militia, Hezbollah nung tanishir jenjang tanabuba nung alisangi ashiba agi, Israel-i Gaza nung civilian tem tepsetba ajanga Middle East nung rara tuluba akumtsü.

Region nung tensa kangasa tamajung adoktsü akok aser shingaiia menokdangtettsü, ta Sheikh Naim Qassem-i BBC dang ashi.

Gaza nung nisung 10,000 dak tema tepsetogo ta Hamas meyong health ministry ajanga shir lia Hezbollah indang deputy leader-i Beirut nung BBC den sensaksem dang iba olen ya ashi.

October 7 nü Hamas teloki Israel nung civilian 1,400 tepsetba sülen Israel-i meyiper amaker. Iba lendong nung asürtem rongnung civilian 1,000 liasü.

"Lendong ya asangsang, kechiaser Israel-i civilian anema tashiyim tali amshir aser tetsür aser tanurtem tali tepseter. Region nung shidakba lendong marui iba azüdokshi manentsü aser tesashiba akumtsü takoktsü na? Nibo aji tamakoktsü amai bilemer," ta pai ashi.

Tensa tamajungba kumra ibaji Israel inyaksangshi den apet asütsü ta pai nenshia ashi. "Tataloktsü aliba ajak nung

telangzüba alitsü," ta pai ashi.

Hezbollah, "the Party of God" dak takoktsü peria lir.

UK, US aser Arab League ajanga kiralongraba lokti ta tenüng agüja aliba Shia Islamist telok ya yimtenren aser mitkar tashi tuluba Lebanon nung lir.

Tang tashi Gaza nung raraba atema parnok tekumdangtsü dang ashir, saka par inyakyim kanga kumdanga asameyanger.

Deobarnü Israel-i southern Lebanon nung amakdang tetsür ka aser tanur asem tepset aser Hezbollah-i Grad rockets mezüngbuba amshia Israel nung civilian ka tepset.

Hezbollah lenir Hassan Nasrallah-i Lebanon nung civilian asüba shia arütsü alema orr tayang kepzüksü ta amokmerena lir. Ajisüaka pai Israel den rara tenzüksübo amokmeren masü.

Jembishinütsü kishi lapoka lir ta nenshia shiaka parnok arütsü alema oa amaker aser talisa mitkartem alidak kongshir. Par züngsem 60 dak tema tepsetogo, ajisüaka parnok melentsü asoshi raratsü jangra alir jenti lir. Tan hopta Beirut nung nisung ka asü, aser paji par kibong nungi Hezbollah asoshi asür nisung pongububa alitsü.

Sensaksem tepiyong Sheikh Naim Qassem-i Hezbollah ya 'defensive organisation' ka ama jemi - ajisüaka parnok

nükjidong ya Israel samatsütsü lir aser 2006 küm parnok arütsü alema oa sepai ana apuba ajanga Israel den rara ka tenzüka liasü.

Israel-i atsükshishia Gaza anema tashiyim amshi tenzüik, ta pai ashi.

Hamas-iang October 7 nü Israel amak ta BBC-i tuteta ashidang, Israel nungeri Palestine nung ali amokbangba asoshi telangzüba agütsüba lir ta pai ashi.

Hamas-i amakba ya Palestine nungeri nokdakba lir aser meyiper parnok makoksa ta pai ashi. Iba sülen Gaza nung nisung 10,000 shi tepsetba indang ya koda? ta asüngdang dang, "Israel nungeri nisung aika tepsetba ajanga Palestine nungeri tali tali ang par li nung azüiter," ta pai langzü.

Iran-i Hezbollah nem rongsen aser teyari agütsür, saka totuyuba magütsür ta pai ashi. Ajisüaka mongintemibo Tehran-i parnok anishir ta ashir.

Israel sepaitemi tongpang tanabuba nung Hezbollah den rara mesüra, parnok linük timba dang nungi nok-nü timba aliba tsükchir ajurutsü ta ashi. Iba telok yagi Hamas ya anisüngzüka yutsütsü, kechiaser parnok ket nung rockets aser missiles 150,000 lir ta ashir.

Parnok special forces, regular fighters aser reserves

densema sepai 60,000 tashi lir, ta Beirut nung amenoka aliba defence and security consultant, Nicholas Blanford-i ashi, shibai küm aika Hezbollah indang asadanga arur.

2006 küm iba telok yagi Israel den rara aser telok katia takok mangu, saka Lebanon nung timba asü. Lebanon nung civilian timba sür nisung 1,000 dak tema tepset aser Hezbollah tashi ita aliba tesem nung kiyong ajanga samatsü. Iba mapang Israel sepai 121 aser civilian 44 asü.

Hezbollah-i arütsü alema oa amakba ajanga iba linük ya parnok mokoktettsüsa rara nung atsüoktsü ta aikati shisabolur. Ajisüaka Sheikh Qassem-i temolung ajema mebilemi "Rara tsübotsü Lebanon nung er ajak temeden lir. Aji shidak dang. Shingaiia rara maginer. Israel nung dang tashiyim amshiba anenang ta shiang, anungjidang rara tuluba makumtsü," ta ashi.

"Gaza nung kechi ataloker, yamaji ataloktsü. Rara matem tashi Israel shibanga ayutsü. Nübur timba bomb shelters nung alitsü. Yangji anung aser tzüyim nung jajar malitsü. Hezbollah indang guided missiles tuluba amshia yangji military targets tem amaktsü. Israel ya 'car park' ka ama akumtsü," ta pai ashi.

Office Of The

KELINGMEN SENSO MONGDANG

P.O- Changtongya 798613, Dist- Mokochung: Nagaland

TENÜNGSANG AGÜTSÜR

Mr. NUNGSANGLEBA S/o Mr. Imkongchuba aser Mrs. Nukenmenla tena jabaso Junior engineer (Mechanical, Class- II Gazetted) Works & Housing Department NPSC CTSE 2023 tatidang nung jenjang tajung nguteta Kelingmen Senso nem konang nungsang bener arutsüba asoshi sensosanger ajaki pelaba den tenüngsang agütsür

Tsüngremi nü wadang nung temoatsü süa len aniangma ta Sensosanger ajaki sarasademtsür.

Sd/-
(T. Supong Jamir)
President, KSM

Sd/-
(I. Bendang Jamir)
Secretary, KSM

45buba Nagaland State Masters Open Badminton Championship 2023 tenzükogo



Dimapur, Yimpoksüi/November 9 (TYO): 45buba Li Ning Nagaland State Masters Open Badminton Championship 2023 aser Nagaland Badminton Association Hon Jubilee mung Brehostibarnü Dimapur Badminton club indoor stadium nung tenzükogo.

Iba asayamung nung district 11 aser Nagaland police densema ajak senteper team 118-i shilem agidar. Iba asayamung ya Dimapur District

Badminton Association-i ayongzüka teburtem atema category balala trok küma lemsar asayadar.

Asayamung lapokba sentong nung alakteta jaoker ama o jembiba mapang Dimapur Urban Council Chairmen Federation, tir Zasivikho Zakiesato-i, badminton asaya amokbaneger asayaba atema Asia nung tem alima ajunga nung kanga nungtugu lir aser iba asaya ya Naga nung asoajen den kanga tapet lir, ta ashi.

Paisa, iba asaya nung lanurtem anitetsü asoshi longjemer inyaksü ayongzüka, kechiyong iba ajanga state nungi temaba jenjang nung takok tajung angurtem anitetsü, ta paisa shisem.

Asaya-i quality aser standard temaba nungdakba kija ya-a lanurtem atema tayongzüka ka lir, ta shia pai, sentong nung shilem agirtem dang pei health aser fitness anepaluba den külemi lanurtem ajungmesotsü ayongzüka liasü.

Asian Championships: Parneet Kaur-i gold medal angu

Yimpoksüi/November 9, 2023 (Agencies): India tsür Parneet Kaur-i Brehostibarnü Asian Championships nung külem India tsür Jyothi Surekha Vennam koka la indang career nung tang mezüngbuba gold medal ngutetogo.

Iba asayamung nung recurve team dang nungi compound archers temi tajung asayaogo aser India team-i gold asem, silver ka aser bronze medal asem nguogo.

India nung asayartemi medal tenet anguba nung recurve asayartemi bronze medal (tetsür team) ka dang ngua liasü.

Tetsür compound individual final nung asaya tom ka tashi Parneet ya point ana agi tesülen liasü, saka arishi küm 18 tain asayar yagi tatembangbuba round ana kanga junga asayaba

sülen point 145-145 aküm aser tie-breaker asayatsüsa aküm.

Taoba ita Asian Games nung gold medal asem tashi anguba sülen Jyothi-i iba final asaya nung junga masayatet aser asaya 8-9 agi mekoki liasü. Parneet-i international jenjang nung tang mezüngbuba gold medal ka nguogo.

Indian compound mixed team nung Aditi Swami aser Priyansh natia final nung Thailand team 156-151 agi koka gold medal nguogo.

Indian compound tetsür team nung Jyothi, Parneet aser Aditi nungeri, Chinese Taipei team 234-233 agi koka gold medal nguogo. Par asemi taoba ita Asian Games nunga gold medal ngur liasü.

Maneni compound men's individual section nung Abhishek

Verma-ia bronze medal ka ngua liasü. India nung asayar tejen yagi South Korea nung asayar Joo Jaehoon 147-146 agi koka liasü.

Kasa mapang nung recurve archer tem ka danga quarterfinals adena masaya. Dhiraj Bommadevara 3-7 agi Tang Chih-Chun-i tsükdaktsü aser Tarundeep Rai-a South Korea nung asayar Kim Je Deok-i 0-6 (27-29, 28-29 29-30) agi koka liasü.

Tetsürtem asaya nung asayar kati danga pre-quarterfinals asaya adena masayatet.

Bhajan Kaur, South Korea tsür World No. 1 asayar Lim Sihyeon-i 0-6 (28-29, 26-30, 26-29) agi tsükdaktsü aser Tisha Punia-i 1-7 (24-29, 27-27, 28-29, 27-28) agi China tsür Hai Ligan mekoki liasü.

Boult-i WC nung wicket 50 agia otsü tasen yanglu

New Delhi, Yimpoksüi/November 9 (Agencies): Brehostibarnü M Chinnaswamy Stadium, Bengaluru nung Sri Lanka den asayaba mapang pacer Trent Boult ya New Zealand nung bowler tem rongnung ICC ODI World Cup nung wicket 50 agiba mezüngbuba asayar kümogo.

New Zealand nung bowler tem rongnung WC nung wicket timtiba agirtem rongnung Tim Southee tanabuba jenjang nung lir. Pai wicket 38 agir lir. Asaya nung Sri Lanka nung asayar Kusal Mendis out sütsüba sülen Boult-i iba alizüng ya tongteta

liasü. ODI World Cup nung left arm bowler tem rongnung wicket timtiba agirtem rongnung tang Australia nung asayar Mitchell Starc temaba jenjang nung lir. Pai tang tashi nung wicket 59 agia lir aser pa indang average 19.74 lir. Iba list nung Boult tasembuba jenjang nung lir.

Taoba mapang Pakistan nung bowler Wasim Akram-i wicket 55 agia pa temaba jenjang nung liasü saka Starc-i pa ajatetogo.

Chaminda Vaas' (49 wicket) ajatetba sülen Boult ya left arm

bowler tem rongnung tang iba jenjang tongtetogo.

Wicket 50 tashi agiba sülen Boult ya ODI World Cup puti otsü nung wicket 50 aser tema agirtem rongnung trokbuba kümogo. Taoba Australia nung bowler Glenn McGrath-i wicket 71 agia pa temaba jenjang nung lir.

Pa sülen tanabuba jenjang nung Sri Lanka nung spinner Muttiah Muralitharan (68). Starc aser Lasith Malinga nati wicket 59 aser 56 agia lir aser pongububa aser trokbuba nung Wasim Akram (wicket 55) aser Boult (wicket 52) na lir.

Pisda aser Kashmina na WFC Dinamo Zagreb nung denogo

Yimpoksüi/November 9, 2023 (Agencies): India tsür football asaya Kiran Pisda aser M K Kashmina na Croatia nung club WFC Dinamo Zagreb den tenangzüktepba yangluogo.

AMPL Foundation aser Football Players' Association of India den longjemer Women in Sports-i ayongzüka tanabuba 'Women in Sports Elite Football Trials' ajanga tena ya shima liasü.

Trails ya Rajarhat kübok AIFF training centre nung agi, kong tetsür football asayar 27, Australia aser Europe kübok club balala nungi asayatsü timla nung shilem agia liasü.

Western United FC Melbourne, Adelaide United FC, Perth SC, WFC Dinamo Zagreb, aser Marbella FC head coach temi Kolkata nung AIFF's National Centre of Excellence nung trails ayongzüka liasü.

Taoba mapang Kerala Blasters nungi asayar Kiran Pisda aser taoba mapang Gokulam aser national team nungi asayar K Kashmina nati WFC Dinamo Zagreb selection committee temulung chidakja

liasü. Domestic nung kanga junga asayaba ajanga tena shimtsü asoshi teyari agütsüogo.

"WFC Dinamo Zagreb nung adentsü kanga yongya atar aser club asoshi akokba tashi tajungtiba agütsütsü. Domestic asaya nung kanga junga asayaba ajanga küsasa dak temulung lemteta kümdaktsüogo aser iba yagi international jenjang nung takok ngua aotsü asoshi yaritsü. Season tenzükatokogo, saka takaratiba nung adapt süa tajungtiba nung asayatetsü imlar," ta Kiran Pisda-i ashi.

Kasa mapang nung Kashmina-i ashiba agi, "iba ya ni atema nükjidong atalokba ka lir. Europe nung asayatsü tejangraba liasü aser ni temaba jenjang nung tajangshiba angütsü yongya atar.."

Head Coach & Sports Director Marija Margareta Damjanovic-i ashiba agi, "onok team nung jenjang aketba asayartem anesemba atema pelar. Parnok takaratiba nung adapt süa nükjidong tongtetsü atema team nem teyari agütsütsü imlar."

Infantino-i FIFA Santosh Trophy Final nung shilem agitsü: Chaubey

Yimpoksüi/November 9, 2023 (Agencies): All India Football Federation tir Kalyan Chaubey-i, Executive Committee nem pa Santosh Trophy aser tanga project atema FIFA den sensak asemba indang osang tejangja metetdaktsüogo.

Pai ashiba agi, National Football Championship, Santosh Trophy koba iba season Arunachal Pradesh nung asayatsü lir iba asayamung dang ya FIFA Santosh Trophy ta ajatsü.

"FIFA den sensak asemba sülen Santosh Trophy dang ya FIFA Santosh Trophy ta ajatsü, ta pelashishia sangdonger. Iba dak sendakba nung iba asayamung ayongzüka asayatsü atema FIFA ketdangsurtem Arunachal Pradesh nung ketdangsurtem den senden ka ametsü asoshi arutsü," ta AIFF tir Kalyan Chaubey-i ashi.

"FIFA tir-a (Gianni Infantino) March 9 mesüra 10 nü final nung shilem agitsü imla atar," ta pai ashi.

AIFF's Executive Committee Brehostibarnü Football House New Delhi nung ajurutepogo. Iba senden ya tir Kalyan Chaubey lenisüba nung agi, kong Vice President NA Haris, Treasurer Kipa Ajay, Acting Secretary General M Satyanarayan, den züngsem members Valanka Alemao,

Menla Ethenpa, Avijit Paul, Syed Husnain Ali Naqvi, Mohan Lal, GP Palguna, Arif Ali, Syed Imtiaz Hussain, Deepak Sharma, Vijay Bali, K Neibou Sekhose, Anilkumar P, Tababi Devi, Pinky Bompal Magar, Shabbir Ali, IM Vijayan. Mulrajsinh Chudasama, Caitano Fernandes aser FSDL nungi lenirtem aser mejeta jaokertemi shilem agia liasü.

FIFA indang Chief of Global Football Development aser nungtugu coach Arsene Wenger-i iba ita India semdangtsü lir aser AIFF tir-i ashiba agi, pai India semdangba ajanga India nung lanurtem terenlok aser project tem atema chapter tasen ka lapoktsütsü.

Kalyan Chaubey-isa, goalkeeper tajungtem anitetsü atema goalkeepers' academy ka amenoktsü sentong aliba lemsatet. Chaubey ya taoba mapang India team goal keeper liasü aser pai züngsemtem dang ashiba agi, taoba mapang Germany nung nungtugu goalkeeper Oliver Kahn-i India semdangba mapang pai pa den sensaksemogo.

Football asaya ajak len prokshidaktsütsü atema I-League asaya kar Jharkhand, Bihar, aser Uttar Pradesh kübok yimitem nung asayatetsü tir-i shidangba Executive Committee-i agizüka liasü.

BILEMDANGANG

"Nai auyaba yari nai tangar tsübor."